

**TALKING POINTS FOR**

**YAB DATO' SRI MOHD NAJIB BIN TUN HAJI ABDUL RAZAK,**

**PERDANA MENTERI MALAYSIA**

**UPACARA PELANCARAN BUKU LAPORAN TAHUNAN 2010 PROGRAM TRANSFORMASI  
KERAJAAN (GTP)**

**27 MAC 2011**

**STADIUM PUTRA, BUKIT JALIL, KUALA LUMPUR**

Bismillahirrahmanirrahim

**Yang Amat Berhormat Tan Sri Muhyiddin Haji Mohd Yassin**

Timbalan Perdana Menteri

**Yang Berhormat Menteri-Menteri Persekutuan**

**Yang Amat Berhormat Menteri-Menteri Besar dan Ketua-Ketua Menteri**

**Yang Berhormat Senator Tan Sri Dr Koh Tsu Koon**

Menteri di Jabatan Perdana Menteri dan Pengerusi PEMANDU

**Yang Berhormat Senator Dato' Sri Idris Jala**

Menteri di Jabatan Perdana Menteri dan Ketua Pegawai Eksekutif PEMANDU

**Yang Berbahagia Tan Sri Mohd Sidek Hassan**

Ketua Setiausaha Negara

**Pemimpin-pemimpin tertinggi perkhidmatan awam,**

**Dif-Dif Kehormat**

**Seluruh rakyat Malaysia yang saya hormati sekalian**

Assalamualaikum warahmatullahi wabarakatuh, Selamat Sejahtera dan Salam 1Malaysia

1. Pertama sekali, saya ingin mengangkat kesyukuran ke hadrat Allah s.w.t. kerana dengan izin-Nya kita dapat berkumpul di Stadium Bukit Jalil pada malam ini. Bagi pihak Kerajaan Malaysia, saya merasa sangat bangga untuk berdiri di sini pada malam ini dan berkongsi dengan tuan-tuan dan puan-puan sekalian, rakyat Malaysia, mengenai pencapaian terkini yang telah dikecapi menerusi agenda Kerajaan yang berani dan telus, dikenali sebagai Program Transformasi Kerajaan atau Government Transformation Programme (GTP).
2. Pada tahun 2010, pihak Kerajaan telah membuat keputusan untuk berhadapan dengan cabaran negara yang paling besar iaitu untuk menggerakkan Malaysia ke hadapan dengan cara yang belum pernah dilakukan sebelum ini, iaitu dengan meninggalkan era di mana 'Kerajaan mengetahui yang terbaik untuk rakyat'. Pada zaman ini, pemimpin tidak boleh lagi mendabik dada mengatakan mereka tahu segala-galanya tentang apa yang diinginkan oleh rakyat tanpa terlebih dahulu mendengar suara hati rakyat. Pemimpin yang perihatin mestilah berupaya merasai nadi rakyat dan selalu mendekati mereka.
3. Oleh yang demikian, kita mengalu-alukan maklumbalas dari Rakyat dalam bidang-bidang yang amat penting demi kehendak rakyat. Dengan sebab inilah juga, kita dapat berkumpul di sini bersama-sama jutaan rakyat Malaysia yang lain yang sedang menonton secara langsung dihadapan kaca televisyen di rumah.
4. Bagi mencapai objektif yang mencabar ini, Kerajaan telah memulakan dengan Program Transformasi Kerajaan atau GTP, di mana, ia bukan sekadar perancangan sahaja, tetapi merupakan satu program terperinci yang disasarkan bagi membawa perubahan-perubahan radikal agar Kerajaan dapat mendekati dan melaksanakan pelbagai perkara bagi menyelesaikan isu-isu penting ini, seterusnya dapat menggerakkan negara secara progresif, dan pada masa yang sama kita terus berusaha mengekalkan perpaduan sebagai satu negara.

Tuan-tuan dan Puan-puan sekalian,

5. Kelahiran GTP adalah dicipta berdasarkan kepada penganalisaan masalah-masalah yang mana negara kita perlu tangani dengan secepat mungkin. Sebagai pelan halatuju berperancangan dengan objektif untuk memperbaiki sistem penyampaian perkhidmatan awam, fokus GTP adalah untuk menyegerakan '*Big Wins*' atau bidang kejayaan besar yang penting dan menyentuh Rakyat (*Peoples' Touch-points*). Kerajaan akan cuba menyampaikan jalan penyelesaian yang sebenar kepada permasalahan-permasalahan ini.

6. Pelan halatuju itu sendiri telah menyenaraikan secara terperinci mengenai setiap program dengan menetapkan inisiatif-inisiatif yang spesifik daripada hanya perancangan makro. Program ini secara keseluruhan adalah berdasarkan kepada komitmen Kerajaan di bawah gagasan 1Malaysia di mana “Rakyat Didahulukan, Pencapaian Diutamakan”.
7. Seperti tuan-tuan dan puan-puan sedia maklum, terdapat enam tiang Bidang Keberhasilan Utama Negara (NKRA) di dalam GTP berdasarkan kepada perkara yang paling diambil berat serta diberi penekanan penting oleh Rakyat. Ianya adalah:  
  
Pertama: Mengurangkan Jenayah  
  
Kedua: Membanteras Rasuah  
  
Ketiga: Memperbaiki Pencapaian Pelajar  
  
Keempat: Meningkatkan Taraf Kehidupan Isirumah Berpendapatan Rendah  
  
Kelima: Mempertingkatkan Infrastruktur Asas Luar Bandar dan  
  
Keenam: Mempertingkatkan Pengangkutan Awam Bandar.
8. Adalah menjadi matlamat Kerajaan, selaras dengan Gagasan 1Malaysia, untuk meneruskan NKRA-NKRA ini dengan penuh dedikasi dan sentiasa mengutamakan rakyat, demi membina sebuah negara yang moden, berjaya, aman damai dan berpendapatan tinggi. Objektif kita adalah untuk memperbaiki kehidupan rakyat Malaysia tanpa mengira bangsa, agama dan status sosial.

Tuan-tuan dan Puan-puan sekalian,

9. Laporan rasmi tahunan GTP ini mengambil kira semua projek serta pencapaian yang telah dicapai pada tahun pertama peringkat pertama (2010-2012) GTP. Ia memberi fokus kepada kejayaan-kejayaan kita termasuk juga kekurangan serta kesilapan, pengajaran penting yang diperolehi dan langkah-langkah seterusnya yang akan Kerajaan laksanakan untuk mencapai Visi 2020.

10. Dalam melaksanakan GTP, kerajaan telah mendengar dan berdialog dengan rakyat melalui Sesi Bersama Rakyat dan Hari-Hari Terbuka di seluruh Malaysia. Ini telah membuka mata kita untuk melihat sesuatu perkara berdasarkan perkara sebenar, melakar tindakan positif dan melaksanakan penyelesaian secara agresif supaya rakyat akan dapat merasai perubahan yang sedang dijalankan oleh Kerajaan.

Tuan-tuan dan Puan-puan sekalian,

11. Lebih setahun telah berlalu, GTP telah menampakkan kejayaan yang penting dan bermakna dalam kesemua NKRA. Di sini, saya ingin memaklumkan kepada seluruh rakyat Malaysia, beberapa pencapaian yang telah dikecapi bagi tahun 2010, seterusnya akan membakar semangat kita lagi untuk terus berusaha mentransformasikan Malaysia ke tahap yang lebih membanggakan.
12. Antara keberhasilan besar yang pantas di bawah GTP ini adalah kemajuan dalam menangani jenayah. NKRA Pengurangan Jenayah menduduki tempat teratas senarai kejayaan yang dicapai. Buat pertama kalinya dalam tempoh empat tahun, kita telah berjaya menurunkan kadar jenayah indeks sebanyak 15% sementara jenayah jalanan menurun kepada 35% di antara Januari dan Disember 2010 jika hendak dibandingkan dengan tempoh yang sama tahun lalu.

Para hadirin sekalian,

13. Pencapaian seterusnya yang patut kita banggakan ialah NKRA Mempertingkatkan Pencapaian Pelajar. Sehingga kini, lebih 700,000 kanak-kanak pra-sekolah telah mendapat manfaat daripada pendidikan awal. Ini telah menyumbang kepada peningkatan terbesar jumlah kanak-kanak yang memasuki pra-sekolah dalam setahun di dalam sejarah Malaysia.
14. Mari kita lihat pula NKRA yang seterusnya, iaitu NKRA Membanteras Rasuah. Penggubalan Akta Perlindungan Pemberi Maklumat atau Whistleblower Protection Act yang menggalakkan pemberi maklumat untuk tampil ke depan bagi mengemukakan laporan tindakan salah laku dengan memberikan perlindungan terhadap identiti mereka. Ini merupakan permulaan yang sangat mantap dalam usaha Kerajaan untuk membanteras rasuah.

Tuan-tuan dan Puan-puan sekalian,

15. Seterusnya, kita beralih kepada NKRA Mempertingkatkan Pengangkutan Awam di Bandar. Kita telah mencatat peningkatan 2.43 juta penumpang LRT dan 192 peratus penumpang Bus Express Transit. Ini juga merupakan catatan kejayaan yang besar.

16. Bagi NKRA Mempertingkat Infrastruktur Asas Luar Bandar, kita telah berjaya mengubah kehidupan lebih 2 juta orang rakyat Malaysia yang tinggal di luar bandar dan di kawasan-kawasan terpencil dimana:

783.1 km jalan telah berjaya dibina

36,273 rumah di luar bandar kini mendapat bekalan air

27,266 rumah di luar bandar kini mendapat bekalan elektrik dan

16,962 rumah di luar bandar juga telah dibina atau dibaik pulih untuk penduduk miskin.

Ini semua adalah satu pencapaian yang sungguh cemerlang dan memberangsangkan dan belum pernah tercatat dalam sejarah.

17. Dari Januari sehingga Disember 2010, bilangan golongan miskin tegar telah berjaya dikurangkan sebanyak 99.8 peratus di bawah NKRA Mempertingkat Taraf Kehidupan Isi Rumah Berpendapatan Rendah. Perkara ini sebenarnya amat sukar untuk dilaksanakan namun terbukti, kita telah pun berjaya melakukannya.

Para hadirin sekalian,

18. Saya tidak akan mengambil masa yang lama untuk membaca pencapaian GTP ini secara terperinci, kerana semuanya telah dimuatkan di dalam Laporan Tahunan GTP 2010 sebanyak 268 muka surat. Buku Laporan ini boleh didapati di kaunter-kaunter yang tersedia dan boleh juga dimuat turun dari laman sesawang. Sebentar lagi, video bagi pencapaian setiap NKRA akan ditayangkan buat paparan kita semua.

Tuan-tuan dan Puan-puan yang dihormati sekalian,

19. Sesungguhnya, kejayaan dan hasil yang memberangsangkan yang dicapai di bawah keenam-kenam NKRA ini menuntut masa, usaha serta dedikasi. Tidak dinafikan, kita telah menghadapi pelbagai halangan dan cabaran, namun kita semua dapat mengatasinya. Semuanya ini merupakan pelajaran yang amat penting, dan kita perlu terus mempertingkatkan kemahiran ini. Saya juga ingin mengingatkan, ini bukanlah masanya untuk kita berpuas hati atau berasa *complacent* dengan kejayaan yang dicapai bagi tahun 2010, dan menyangka secara automatik kejayaan yang sama akan dicapai pada tahun 2011. Hakikatnya, tiada kejayaan yang dapat dicapai dengan mudah tanpa disertai kegigihan, kekentalan semangat, dan juga pengorbanan yang tinggi.
20. Sebelum saya mengakhiri ucapan ini, saya ingin merakamkan setinggi-tinggi penghargaan kepada semua pihak yang terlibat memainkan peranan dalam menjayakan Program GTP ini. Pencapaian keberhasilan yang positif pada tahun pertama GTP ini tidak mungkin terlaksana jika tidak didukung oleh usaha penjawat awam yang tidak pernah mengenal penat dan jemu, Kementerian-kementerian yang terlibat, pihak media serta rakyat sekalian. Saya juga ingin mengucapkan terima kasih atas sumbangan dan juga maklum balas bernilai yang telah diberikan. Kerajaan sangat mengalu-alukan sokongan tuan-tuan dan puan-puan semua secara berterusan, sejajar dengan usaha Kerajaan yang gigih untuk merealisasikan semua sasaran yang telah dijanjikan.
21. Akhir kata, disamping kita berhibur dengan acara seterusnya pada malam ini, marilah kita semua terus berusaha mentransformasikan negara ini dengan mempertingkatkan lagi kerja-kerja untuk menjayakan program GTP pada tahun ini dan seterusnya.

Sekian, terima kasih.

Wabillahi taufik walhidayah, wassalamualaikum warahmatuallahi wabarakatuh.